

MOCIÓN EN CONTRA DA INSTALACIÓN DUNHA PLANTA DE TRATAMENTO DE RESIDUOS OLEOSOS NO PEIRAO DE OZA

Ángel García Seoane, como voceiro do Grupo Provincial da Alternativa dos Veciños, ao abeiro do disposto no Regulamento Orgánico da Deputación da Coruña, presenta para a súa aprobación polo Pleno provincial esta moción en base á seguinte:

EXPOSICIÓN DE MOTIVOS

O 23 de outubro de 2017 publícase no nº 201 do DOG un anuncio de 29 de setembro de 2017, da Dirección Xeral de Calidade Ambiental e Cambio Climático, no que se fai público o informe de impacto ambiental da planta de recepción e pre-tratamento de residuos xerados por buques, no Concello da Coruña, promovido por Limpeza Marítima de Óleos S.L.U. Limpoil (clave do proxecto 2017/0167).

Tal e como se reflicte na propia resolución, así como no estudo de impacto simplificado obxecto da mesma, a planta tería unha capacidade máxima de xestión de refugallo de 4.000 toneladas ao ano, cunha capacidade máxima de tratamento de 26.280 metros cúbicos anuais, dos que se espera extraer mil toneladas ao ano de augas residuais. A planta estaría composta por:

- Dous tanques de 65.000 litros para almacenaxe; un deles para almacenaxe de residuos MARPOL con mestura non emulsionada sometidos a pre-tratamento, e outro para almacenaxe de residuos MARPOL formados por mestura emulsionada.
- Un tanque de 28.000 litros para recepción e almacenaxe de residuos de aceite.
- Un tanque de 30.000 litros con funcións auxiliares.

A instalación dunha planta destas características é totalmente incompatible coa actividade dun porto pesqueiro como é o de Oza, nunha localización a menos de 500 metros dos bancos de produción marisqueira, ó carón das praias de Oza e Santa Cristina.

O propio informe da Consellería de Medio Ambiente reconece que a área de impacto é “especialmente sensible” pola proximidade da ría e as praias. A pesares dos riscos, a Consellería conclúe o informe afirmando que «*non son previsibles efectos significativos sobre o medio ambiente*» e negando a necesidade de que o proxecto sexa sometido a unha avaliación de impacto ambiental ordinaria, esixindo unicamente unha declaración de impacto ambiental simplificada (a mínima documentación esixida pola lei). Por contra, os contra informes da Dirección Xeral de Saúde Pública e da Dirección Xeral de Desenvolvemento Pesqueiro —ambas dirección pertencentes á propia Xunta de Galicia— reclaman un seguimento da calidade das augas de baño cunha análise de riscos para elaborar o plan de emerxencias e medidas que aseguren a protección dos recursos pesqueiros de acordo co establecido na Lei 11/2008, do 3 de decembro, de pesca en Galicia, respectivamente.

En resposta á actitude permisiva da Consellería de Medio Ambiente, o 27 de novembro de 2017, a Asociación de Veciños de Oza-Gaiteira-Os Castros difunde unha proposta de moción para que os grupos políticos da Coruña presenten rexeitando a instalación da devandita planta. O 30 de novembro, Alternativa dos Veciños rexistra a moción en Oleiros, e esta é aprobada no seguinte Pleno municipal. O Pleno de A Coruña aproba tamén a moción o 4 de decembro de 2017 coa abstención do PP.

Á marxe das conclusións timoratas do informe de impacto ambiental da Consellería de Medioambiente e Ordenación do Territorio, emitido o 27 de setembro de 2017, hai que contextualizar unha serie de circunstancias que son intolerables:

En primeiro lugar, é necesario lembrar a natureza da empresa Limpoil S.L.U. cuxas cuestionables prácticas con respecto ao tratamento de residuos levaron ao Concello de Oleiros a presentar unha demanda en 2002. Ese ano, a Policía local do municipio colleu *in situ* a un camión cisterna da empresa Port-Vigo (matriz de Limpoil) derramando aceites procedentes de barcos de forma irregular ao alcantarillado público a través dunha nave no polígono de Icaria que nin sequera estaba dada de alta.

En segundo lugar, hai que seguir facendo fincapé nas nefastas consecuencias ambientais que teñen este tipo de instalacións na nosa xeografía. Só no ano 2017 producíronse en toda España 57 incendios en plantas de xestión de residuos, todos eles contrastables a través da prensa do país.

Nos últimos dous anos, destacou pola súa gravidade e prexuízo medioambiental o catastrófico incendio de 2016 de 100.000 toneladas de neumáticos en Seseña. Pero son moitos os que se produciron no 2017, a destacar:

- **4 de xaneiro:** incendio de planta de reciclaxe de materiais de Construción en Lesaka (Navarra).
- **19 de febreiro:** incendio nunha planta de residuos de Atarfe (Granada)
- **13 de marzo:** incendio dunha planta de tratamento de residuos en Caudete de las Fuentes (Valencia) (habería outro o 4 de abril no mesmo lugar).
- **17 de abril:** incendio na Planta de reciclaxe de Els Alamús (Lleida). 40 toneladas de plásticos calcinadas.
- **4 de maio:** explosións na planta de residuos de Arganda del Rey, cun saldo de 36 persoas feridas e máis de 40 toneladas de plásticos calcinadas.
- **O 18 de xuño:** en Málaga, un incendio de grandes dimensións calcinou ata as cinzas un almacén de residuos no polígono industrial de Ronda.

E poderíanse citar multitude de sinistros destas características en cada un dos meses do ano, pero hai que destacar tamén aqueles que se deron na nosa provincia, A Coruña, que non está en absoluto libre desta lacra. Algúns exemplos recentes son:

- **Ribeira, marzo de 2017:** incendio nunha planta de reciclaxe e refugallos abandonada.
- **Arteixo, maio de 2017:** incendio na planta de reciclaxe de residuos de Gestán, en Santa Icí.
- **As Somozas, 19 de xaneiro de 2018:** incendio na planta de residuos de Sogarisa, cunha instalación de máis de 3.000 metros cadrados calcinada, con centos de depósitos de plásticos e produtos químicos no seu interior;
- **Padrón, 23 de xaneiro de 2018:** explosión na planta de FINSA, 8 feridos, un deles de gravidade.

Alternativa dos Veciños entende que o tecido industrial é un factor de creación de emprego. Non obstante, as industrias teñen que asegurar un desenvolvemento medioambiental acorde co benestar das persoas.

Son moitas as décadas que a veciñanza leva loitando por unha ría do Burgo saneada, xeradora de riqueza a través de actividades de lecer, pesca e marisqueo. É necesaria a protección dos espazos naturais para que estas actividades se poidan desenvolver sen risco. E é evidente que unha planta de pre-tratamento e xestión de residuos oleosos en plena ría non é máis que un novo risco de contaminación ambiental para unha zona cunha importante actividade tanto económica, como de lecer e sociocultural.

Por todo o exposto, o Grupo Provincial de Alternativa dos Veciños solicita por parte do Pleno da Deputación da Coruña a aprobación dos seguintes:

ACORDOS

1. Amosar publicamente o rexeitamento da Deputación da Coruña á construción desta planta de pre-tratamento de aceites industriais e hidrocarburos no Peirao de Oza, na Coruña.
2. Apoiar ás entidades veciñais e organizacións que xa se teñen posicionado en contra da construción desta planta e xa teñen presentado alegacións ao proxecto.
3. Que a Deputación da Coruña, como parte interesada, faga un seguimento continuo dos procedementos administrativos relacionados co obxecto de impedir a construción desta planta no peirao de Oza.
4. Demandar da Xunta de Galicia a desestimación e rexeitamento da construción dunha planta de recepción de pre-tratamento de residuos oleosos xerados por buques no Concello da Coruña, promovida por Limpoil S.L.U. (clave do proxecto 2017/0167)

En A Coruña, a 7 de febreiro de 2018

Asdo:

Ángel García Seoane

**Voceiro do Grupo Provincial da
Alternativa dos Veciños**

Grupo Provincial Alternativa dos Veciños
Grupo.alternativavecinos@dicoruna.es

981 080 610

